

Inatsisartut suleriaasianni § 37, imm. 1 naapertorlugu, matumuuna Naalakkersuisunut imaattunik apeqquteqarpunga:

Naalakkersuisunut apeqqutit:

1. Naalakkersuisut 2023-mi aalajangiinerat, Tunumi qilalukkat qaqortat qernertallu neqaat mattaallu Kalaallit Nunaata Kitaanut nassiuteqqusaanatillu nassaqqusaannginnerannik kiisalu Qallunaat Nunaannut nassiuteqqusaannginnerannik, aalajangersagaq taanna maannakkut sulii atuuppa?
2. Aalajangiineq pineqartoq inatsisitigut suna tunngavigalugu aalajangiunneqarpa, aammalu nalunaarummi, inatsimmi imaluunniit allatigut aalajangersakkami sorlarmi inerteqqut aalajangersagaava? Naalakkersuisut aalajangiinerup ullua, sulii normua aammalu inatsisitigut tunngavia paasissutissiissutigissavaat.
3. Suna pissutigalugu Tunumi qilalukkat qaqortat qernertallu neqaat mattaallu Kalaallit Nunaata Kitaanut nassiuteqqusaanatillu nassaqqusaanngillat? Aalajangiineq uumassusilerituunit inassuteqaatinik, piujuartitsinissamik, Tunumi neqissaqarniarnermik, nakkutilliinermik imaluunniit allanik tunngaveqarpa?
4. Kalaallit Nunaata Kitaani qilalukkat qaqortat qernertallu neqaat mattaallu aqutsiveqarfiit, kommunit, illoqarfiit imaluunniit nunaqarfiit akornanni nassiunneqarsinnaanerannut, nassarneqarsinnaanerannut imaluunniit tuniniarneqarsinnaanerannut killilersuutini imaluunniit inerteqqutini maannakkut peqarpa? Peqarpat sumiiffinni sorlarni atuuppat, sunillu tunngaveqarpat?
5. Kalaallit Nunaata Kitaani taamatut killilersuuteqartoqarsimappat, killilersuutit ataasiakkaat inatsisitigut tunngavii, siunertaat aammalu atuuffii Naalakkersuisut nassuiaatigeqquneqarput. Aamma pineqartut Tunumi atuuttumit qanoq assigiinngissuteqarnerat nassuiaatigeqquvara.
6. 2026-mi Tunumi qilalukkat qaqortat qernertallu pisassiissutigineqarmata, Naalakkersuisut nalilersimavaat pisarineqareersut neqaat mattaallu Kalaallit Nunaata Kitaanut killilimmik nakkutigineqartumillu nassiunneqarsinnaanerat, nassarneqarsinnaanerat imaluunniit tuniniarneqarsinnaanerat ammaanneqarsinnaanersoq? Nalilersuisoqarsimappat inerniliussaq suua?
7. Naalakkersuisut naliliinerat naapertorlugu, piniartut inatsisit naapertorlugit pisarisamik neqaannik mattaannillu tuniniaallutik isertitaqarnerunissaannut periarfissat Tunumi aamma Kalaallit Nunaata Kitaani qanoq annertusarneqarsinnaappat, piujuartitsineq, nakkutilliineq aammalu sumiiffinni neqissaqarniarneq innarlinngikkaluarlugit?

8. Naalakkersuisut 2023-mi aalajangiinerup imaluunniit qilalukkat neqaanik mattaannillu nunatsinni assartuussinermut tuniniaanermullu allatigut atuuttunik killilersuutit qasukkaanneqarnissaat, allanngortinneqarnissaat imaluunniit atorunnaarsinneqarnissaat isumaliutigisimavaat? Aappiuppat akissuteqarunik qanoq; naamiuppat akissuteqarunik suna pissutigalugu?

(Inatsisartunut ilaasortaq Mette Arge-Hammeken, Naleraq)

Tunngavilersuutit:

2026-mut qilalukkanik qaqortanik qernertanillu pisassiissutit pillugit 22. oktober 2025-imi tusarniaassummi oqaatigineqarpoq Naalakkersuisut 2023-mi aalajangiisimasut Tunumi qilalukkat qaqortat qernertallu neqaat mattaallu Kalaallit Nunaata Kitaanut nassiuteqqusaanatillu nassaqqusaanngitsut kiisalu Qallunaat Nunaannut nassiuteqqusaanngitsut.

2026-mut qilalugartassanik Naalakkersuisut 18. december 2025-imi aalajangiineranni Tunumi qilalukkat qaqortat 2022-2027-mut teknikikkut pisassiissutit attatiinnarneqarput, 2026-2027-mullu arfineq-marluk sinnerullutik. Tunumi qilalukkat qernertat 2026-mi 41-nik pisassiissutigineqarput, neqissaqarniarneq immikkut eqqarsaatigalugu.

Piniartut namminersorlutik inuussutissarsiortuupput. Taamaattumik inatsisit naapertorlugit pisarineqareersup sapinngisamik annertunerpaamik atorineqarsinnaanissaa aammalu piniartup pisaminit isertitaqarsinnaanissaa pingaaruteqarpoq.

Apeqqutitigut aamma paasiniarneqarpoq Kalaallit Nunaata Kitaani nammineq, assersuutigalugu aqutsiveqarfiit, kommunit imaluunniit illoqarfiit nunaqarfiillu akornanni, qilalukkat qaqortat qernertallu neqaannik mattaannillu nassiussinermut, nassarnermut imaluunniit tuniniaanermut assingusunik killilersuisoqarnersoq. Taamaalilluta Tunumi atuuttoq immikkut ittuunersoq imaluunniit nunatsinni sumiiffinni allani assingusumik malittarisassaqarnersoq paasisaqarfigisinnaavarput.

Kiisalu siunertaavoq paasissallugu killilersuutit sulii pisariaqartinneqarnersut aammalu piujuartitsineq, nakkutilliineq sumiiffinnilu neqissaqarniarneq qulakkeerneqarsinnaappata piniartut pisaminnik tuniniaasinnaanannut killilimmik nakkutigineqartumillu ammaasoqarsinnaanersoq.

Apeqqutigineqartut ullut suliffiusut qulit (10) iluanni allakkatigut akineqareersimanissaat piumasarineqarpoq. Oqaatsinik nutserisimanermi paatsuungasoqassatillugu kalaallisut allassimasoq aallaavigineqassaaq.